

ԱԶԳԱՅԻՆ ԴԻՄԱԳՈՒ ՊԱՀՊԱՆՄԱՆ ԽՆԴԻՐԸ
ԶՄԻՒՌՆԻԱՅԻ «ԱՇԽԱՏԱՆՔ» ՊԱՐԲԵՐԱԿԱՆԻ ԷԶԵՐՈՒՄ
(1910-1915 թթ.)

Մարիամ Վ. Յովսեփեան

ՆԵՐԱԾՈՒԹԻՒՆ

Արեւմտեան Հայաստանում եւ Օսմանեան կայսրութեան հայաշատ բնակավայրերում տարրուող պետական յատուկ մշակութած հայահալած քաղաքականութեան պայմաններում հայութեան համար առաջնահերթ խնդիր էր ազգային դիմագծի պահպանումը: Այդ նպատակին էին ծառայում ազգային-հոգեւոր, կրթական եւ մշակութային բոլոր կառոյցներն ու հաստատութիւնները: Այս գործընթացն ունէր իր իւրայատկութիւնները մասնաւորապէս զմիւռնիահայութեան կեանքում, ինչը պայմանաւորուած էր տուեալ դադթօջախի ձեւաւորման եւ կենսապահովման առանձնայատկութիւններով¹: Դրանում ի սկզբանէ սեփական կնիքն էր դրել տեղի հայկական մամուլը², որը փորձել էր հասարակական կարծիքի ձեւաւորման միջոցով հասնել յիշեալ հիմնահարցի լուծմանը: Դրան անմասն էր մնացել նաեւ Զմիւռնիա քաղաքում 1910-1915 թուականներին հրատարակուած «Աշխատանք» պարբերականը: Այն լոյս է տեսել չորեքշաբթի եւ շաբաթօրերին «Քնիշեան» տպարանում: Հիմնական աշխատակիցները ժամանակի յայտնի հասարակակա-քաղաքական գործիչներն ու մտաւորականութեան ներկայացուցիչներն էին՝ Է. Ակնունին, Աւետիս Ահարո-

նեանը, Մկրտիչ Պարսամեանը, Մարգարե-տը, Համբարձում Համբարձումեանը, Վահէ Տիճեանը եւ այլք³: Պարբերականի տէրը եւ տնօրէնը Սեդրակ Թոքաճեանն էր:

«ԱՇԽԱՏԱՆՔ» ԹԵՐԹԻ ՄՏԱՀՈԳՈՒԹԻՒՆՆԵՐԻ ԱՌԱՋԻՆ ՏԵՂՈՒՄ ՀԱՅԿԱԿԱՆ ԴԻՄԱԳՈՒ ՊԱՀՊԱՆՄԱՆ ԵՒ ԱԶԳԱՅԻՆ ԿՐԹՕԶԱՆՆԵՐԻ ԽՆԴԻՐՆԵՐՆ ԷՒՆ

Յենուելով զմիւռնիահայ մամուլի աւանդոյթների վրայ, որոնք ձեւաւորուել էին դեռեւս 19-րդ դարի 40-ական թուականներից⁴, «Աշխատանքը» դարձել էր դրանց շարունակողը եւ արծարծել էր մեր ժողովրդին յուզող տարաբնոյթ խնդիրներ, անդրադարձել էր իշխանութիւնների հայահալած գործելակերպին, արեւմտահայութեան հանդէպ թոյլ տրուող անիրաւութիւններին եւ թալանին, սոցիալական պայմաններով պայմանաւորուած արտագաղթին հայրենի բնակավայրերից, Հայկական հարցի զարգացումներին, ընթերցողների մշակութային հետաքրքրութիւններին եւ բազմաթիւ այլ հարցերի: Խմբագրակազմի համար այդ ամէնը կարծես դարձել էր հայեցի կրթութեան, ազգային աւանդոյթներին հաւատարիմ մնալու, հայութեան դիմագիծը պահպանելու, ներքին կեանքն առաւելապէս

1 Հայ պարբերական մամուլի պատմութիւն XVIII-XIX դարեր, Կահիրէ, 2006, հտ. 1, էջ 155-156:

2 Ալբերտ Խառատեան, Զմիւռնիայի եւ Էդէսի առաջնեակի հայկական այլ գաղթօջախները (XVI-XIX դ. I կէս), Երևան, 2022, էջ 425-429:

3 «Աշխատանք», Իզմիր, 1910, թիւ 11:

4 1908-1914 թուականներին Զմիւռնիայում եւ Կ. Պոլսում հրատարակուել է անելի քան 120 պարբերական, իսկ Արևմտեան Հայաստանում ու Կիլիկիայում՝ շուրջ 30 թերթ եւ ամսագիր (տե՛ս Հայ պարբերական մամուլի պատմութիւն 1900-1922, Երևան, 2017, հտ. 2, էջ 213-214):

ինքնուրույն վարելու եւ հայ մնալու առաջնային նպատակին հասնելու միջոց:

Շեշտենք, որ այս թերթի դիմագիծը եւ որդեգրած քաղաքականութիւնը պայմանաւորուած էին հրատարակութեան ժամանակահատուածով, որն ընդգրկում էր 1908 թուականի երիտթուրքական յեղաշրջմանը եւ իշխանազաւթմանը յաջորդող տարիներից մինչեւ Հայոց ցեղասպանութեան սկզբնական փուլն ընկած շրջանը: Այդ տարիներին առերեւոյթ թոյլ էր տրուած նաեւ մամուլում արտայայտել տեսակէտներ ու կարծիքներ, ներկայացնել հանրային տրամադրութիւնները պետական կառոյցների գործունէութեան եւ ծրագրերի վերաբերեալ: Չպէտք է մոռանալ, որ միեւնոյն ժամանակ մամուլի նիւթերը, գրական ստեղծագործութիւններն անցնում էին գրաքննութեան ծանր մամլիչի տակով:

«Աշխատանքի» համար ռազմավարական նշանակութիւն ունէին ազգային դիմագծի պահպանման, աճող սերնդի հայեցի դաստիարակութեան եւ կրթութեան խնդիրները: Ընդ որում, խմբագրակազմը դրանք փոխկապակցուած էր համարում ու հայկական դիմագծին հաւատարիմ մնալու հարցերին անդրադառնում էր կրթագաստիարակչական թեմայի շրջանակում: Չկար որեւէ համար, որտեղ խմբագրութիւնն առնուազն երկու յօդուած չնուիրէր յիշեալ հարցերին: Անգամ 1915 թուականին Հայոց ցեղասպանութեան բռն շրջանում թերթում դրանք կրկին առաջնային էին:

Ի տարբերութիւն ժամանակի արեւմտահայ այլ պարբերականների՝ «Աշխատանքը» քննարկում էր ոչ թէ ուսուցիչների ցածր աշխատավարձին կամ նիւթական անձուկ կացութեանն առնչուող խնդիրները, այլ ազգային կեանքում նրանց դերի ու

պատասխանատուութեան հարցերը⁵: «Գաւառի ուսուցչութեան շուրջ» թղթակցութեան հեղինակ Վահէ Տիճեանի կարծիքով՝ մի շարք բնակավայրերում ուսուցչի կոչմանն անհամապատասխանութիւնն էր արեւմտահայ գաւառի ուսուցիչների արգահատելի դիրքի պատճառը⁶: «Դպրոցէն կերպով մը իյնալու վախէն ահաբեկ, չգէտ թաղական կամ Ուսումնական խորհուրդներու եւ Հոգաբարձուներու բերանէն կախուող, քծնող ուսուցիչներու չափազանց շատ գոյութիւնը գաւառու մէջ ամենամեծ պատճառն է այս բարոյական ողբալի սնանկութեան», - գրում էր Վ.Տիճեանը⁷: Զարեհ Գնունին իր ուղարկած թղթակցութեան մէջ տեղեկացնում էր, որ էտիրնէի երկսեռ վարժարանի ուսուցիչների եւ տեսուչ խորթուսանի գործելակերպից ծնողներն այնքան դժգոհ էին, որ նրանց մեծ մասն իրենց երեսններին տեղափոխում էր ուրիշ կրթօջախներ⁸: Ուսուցիչների մէջ կային նաեւ լրտեսութեամբ զբաղուող անձինք, որոնց դէմ ընդվզում էին աշակերտները: Տարսոնի թղթակից ինչիկ Քարուկեանը գրում էր, որ տեղի հայկական քոլեճի ուսուցիչ Գեւորդ Տամլամեանը լրտեսի համբաւ ունէր, իսկ պատմութեան ու թուրքերէնի ուսուցիչ Սիմոն Քիւլիկեանը դասաժամերին անարգում էր հայոց լեզուն եւ հայ գրականութիւնը⁹: Ուսուցիչ-ուսուցչուհիները, եթէ համարձակուած էին ընդվզել տիրող անառողջ մթնոլորտի, դպրոցներում կիրառուող կամայականութիւնների եւ անօրինութիւնների դէմ, ապա ենթարկուած էին անարգանքի ու հալածանքի: Ուսուցիչ բառը շատ վայրերում հոմանիշ էր համարուած հալածանքի եւ զրկանքի առարկայ բառերին¹⁰: «Աշխատանքը» բերում էր փաստեր, երբ ուսուցիչները

5 «Աշխատանք», Իզմիր, 1913, թիւ 2:

6 Նոյն տեղում:

7 Նոյն տեղում:

8 Նոյն տեղում, 1910, 11 սեպտեմբեր:

9 Նոյն տեղում, 1911, 9 ապրիլ:

10 Նոյն տեղում, 1913, թիւ 2:

պատժում էին իրենց համարձակ պահուածքի համար¹¹: Թերթը Զմիւռնիայի մէկից աւելի վարժարանների ու դպրոցների «ընկած» վիճակի համար պատասխանատու էր համարում հիմնականում Իզմիրի հոգեւոր առաջնորդ Մատթէոս Ինճեանին¹², ով, ըստ այդ հրապարակումների, ամէն ինչ անում էր, որ կրթօջախներից անձնական չհոյթ ունենար¹³:

Պարբերականի համար անընդունելի էր Հռիփսիմեան օրիորդաց վարժարանում սովորական դարձած այն երեւոյթը, որ աւարտական քննութիւնների ժամանակ աշակերտուհիներն իրարից արտադրում էին յանձնարարութիւնների պատասխանները: «Հռիփսիմեանը իր ամբողջ ուսուցչական կազմին մէջ մէկ հատիկ վարժուհի իսկ չուներ՝ Իզմիրի համար զարգացած հայուհիներ պատրաստելու կարող», - գրում էր «Աշխատանքը»՝ աւելացնելով, թէ կանանց դաստիարակութիւնը եւ կրթութիւնն այն ներուժ կուտաններն էին, որոնց վրայ բարձրանում էր ազգի գոյութեան վերնաշէնքը¹⁴:

Հայեցի դիմագծի պահպանման դործում ազգային կրթօջախների դերի արժեւորման տեսանկիւնից կարեւոր էր Միւլքոն Յովսէփեանի «Մի ձեռքը ծափ չի տար. մանկավարժական հարցեր» երկմասանի յօդուածը¹⁵: Հեղինակն այդտեղ իրավիճակը շտկելու ուղիներ էր մատնանշում՝ գրելով, թէ դպրոցն, առանձին վերցրած, ոչինչ չէր կարող անել. «Մէկ ձեռքը ծափ չի տար, եւ անհրաժեշտ է ընտանիքի աջակցութիւնը»¹⁶: Ըստ այդմ՝ դպրոցը եւ ընտանիքը պէտք է ձեռք ձեռքի տային եւ միասին

զբաղուէին երեխաների կրթութեան ու դաստիարակութեան գործով: «Աշխատանքը» նշում էր, որ կրթութիւնը ազգային դիմագիծը պահող կենսական անհրաժեշտութիւն էր հայութեան համար¹⁷: Ներկայացնում էր գաւառում յաջողութեան հասած ազգային վարժարանների օրինակներ, ի թիւս որոնց՝ Վանի Սանդուխտեան օրիորդաց դպրոցի 40-ամեայ փորձառութիւնը¹⁸: «Աշխատանքը» մինչեւ վերջին համարը անդրադարձել էր այս թեմային: Ասուածի վկայութիւնը 1915 թուականի գրեթէ բոլոր համարներում առկայ վերլուծական յօդուածներն էին:

Ներկայացուած հիմնախնդիրներին դուգահեռ՝ «Աշխատանքը» փորձում էր հրապարակումների միջոցով բացատրել, որ ազգային լիարժէք կրթութիւն ստանալու եւ հայկականութիւնը պահելու համար անհրաժեշտ էր բարեփոխել երկրի սոցիալատեսակական ու քաղաքական պայմանները: «Հայ ժողովուրդը ենթարկուած է քաղաքական անլուր ճնշումներու, հայահալած ու ջնջող վարչութեան մը, իրաւագրկութեան ամենէն գեհնիկ տեսակին, ասոնք մէկ կողմէն, իսկ միւս կողմէն քրդական զինուած հրոսակներու դէմ ան կանգնած է բոլորովին անպաշտպան եւ անզէն», - գրում էր պարբերականը¹⁹: Դիմում էր նաեւ ընթերցողներին, որ նրանք գործադրէին բոլոր միջոցները՝ հայրենիքը չքքելու եւ ազգային դիմագիծը պահպանելու համար:

11 Նոյն տեղում:

12 Մատթէոս ծայրագոյն վարդապետ Ինճեանը ծնուել էր 1878 թուականին Կ.Պոլսում: Նախնական կրթութիւն ստացել էր պատրիարքարանի, ապա Ղալաթիայի ազգային կենտրոնական վարժարաններում: 1904 թուականին մա դոկտորի աստիճանով ավարտել էր Փարիզի իրաւաբանական համալսարանը: 1909 թուականին ձեռնադրուել էր Կուսակրօն արեղա՝ հետագայում դառնալով ծայրագոյն վարդապետ (տե՛ս

Վաւերագրեր հայ եկեղեցու պատմութեան, գիրք Ը, Երևան, 2001, էջ 951):

13 «Աշխատանք», Իզմիր, 1913, թիւ 3:

14 Նոյն տեղում, 1913, թիւ 5:

15 Նոյն տեղում, 1913, թիւ 25, 26:

16 Նոյն տեղում, 1913, թիւ 26:

17 Նոյն տեղում, 1914, թիւ 55:

18 Նոյն տեղում, 1914, թիւ 52:

19 Նոյն տեղում, 1914, թիւ 52:

«ԱՇԽԱՏԱՆՔԸ»՝ ՀԱՅԵՑԻ ԴԻՄԱԳՐԻ
ՊԱՆՊԱՆԱՆ ԳՈՐԾՈՒՄ ԱԶԳԱՅԻՆ
ՀԱՄԱԽԱՐԱՐԱՆ ԵՒ ՄԻԱՍՆԱԿԱՆ
ՊԱՅՔԱՐԻ ՄԱՍԻՆ

Թերթն անդրադարձել էր արտագաղթի եւ բնօրրանի դատարկման կործանարար հետեւանքների դէմ պայքարելու նպատակով 1913 թուականի ամռան վերջին Զմիւռնիայի հայ քաղաքական երեք կուսակցութիւնների («Դաշնակցութեան Իզմիրի Կոմիտէի, Հնչակեան Իզմիրի մասնաճիւղի, Սահմանագիր-ռամկար ակումբի»²⁰) մի շարք խորհրդակցական ժողովներից յետոյ ստեղծուած միջկուսակցական համերաշխութեան մարմնի՝ «Հայկական դատի շուրջ միասնաբար պայքարելու համար»²¹ իրականացուող աշխատանքներին: Նրանք դա հիմնադրուած էին «քաղաքական ներկայ բացառիկ կացութեամբ եւ մասնաւոր խրատուած այն դառն փորձերէն, որոնք անցեալին մէջ այնքան ոյժեր վատնել տուին»²²:

«Աշխատանքը» տարագրել էր Իզմիրահայութեան համերաշխութեան մարմնի ծրագիրը²³, որտեղ մանրամասն շարադրուած էին նաեւ այդ կառոյցի նպատակները: Յիշեալ մարմինը ձգտելու էր հաշտարար եղանակով լուծել տարածաշրջանում ծագող ազգային վէճերը, նպաստել համերաշխութեան միջնորդարար պահպանմանը եւ այդ կերպ օգտակար լինել ազգի կենսական շահերին²⁴: Թերթը նաեւ լուսաբանել էր Զմիւռնիայի Միջկուսակցական համերաշխութեան մարմնի աշխատանքները: Հրապարակումներից պարզ էր դառնում, որ անպտուղ էին մնում ազգային ուժերը համախմբելու ջանքերը, եւ այդ կառոյցը դատապարտուած էր անգործութեան²⁵:

«Աշխատանքը» անբարենպաստ եւ կործանարար էր համարուած այդ իրավիճակը, քանզի գիտակցում էր, որ թէեւ Հայկական հարցի լուծման համար նպաստաւոր (միեւնոյն ժամանակ վտանգաւոր) պայմաններ էին ստեղծուել, բայց կառավարող «Իթթիհատ վէ թերագգ» կուսակցութիւնը չէր հանդուրժում այլախոհութիւնը եւ ազգերի ինքնավարութիւնը, առաջնորդուած էր «միատիրական անյազ ախորժակով»²⁶: Յօդուածներից մէկում հայութեանը կոչ էր արւում լինել աշալուրը²⁷, որովհետեւ բարդ էր Հայկական հարցի լուծման գործընթացը. տարբեր պետութիւններ այստեղ հետապնդում էին իրենց շահերը: Յօդուածագրի կարծիքով՝ հայ ժողովրդին մնում էր ապաւինել իր իսկ ուժերին եւ ինքնօգնութեան դիմել²⁸: Է. Ակնունին, օրինակ, հայ հանրութեան ուշադրութիւնը հրաւիրում էր մտահոգիչ այն հանգամանքների վրայ, որոնք բարդացնում էին Հայկական հարցի լուծման գործընթացը եւ խանգարում էին սեփական հայրենիքում հայ մնալուն: «Այժմ մի կողմից թիւրքական սահմանների նւազեցումը եւ պետական քաղաքականութեան ձախողանքը, իսկ միւս կողմից եւրոպական շահերի նոր դասաւորումը հայկական դատը դարձրել են օրուան մեծ խնդիրը, այն կեդրոնական կէտը, դէպի որը իր հայեացքն է սեւեռած ոչ միայն հարեւան Ռուսիան, այլեւ հեռաւոր Գերմանիան, մի հարց, որ իր համեստութեամբն հանդերձ՝ եւրոպական շահերը չօշափելու գաղտնիքն ունի», - կարծում էր Ակնունին²⁹: Նա առաջարկում էր աշխարհաքաղաքական այդ կարեւոր ժամանակահատուածում ուժերը

20 Նոյն տեղում, 1913, թիւ 19:

21 Նոյն տեղում:

22 Նոյն տեղում:

23 Նոյն տեղում, 1913, թիւ 28:

24 Նոյն տեղում:

25 Նոյն տեղում, 1913, թիւ 23:

26 Նոյն տեղում, 1913, թիւ 25:

27 Նոյն տեղում, 1913, թիւ 29:

28 Նոյն տեղում:

29 Նոյն տեղում, 1913, թիւ 17:

չվատնել մանր-մուկներ կենցաղային խնդիրների վրայ, այլ՝ համախմբուել եւ միասնաբար գործել³⁰:

Թերթում ազգային համախմբման անհրաժեշտությունը յատկապէս շեշտուում էր՝ 1913 թուականի կէսերից սկսած: Բերենք բնորոշ օրինակ: «Երեսփոխանական ընտրութիւնները եւ հայերը» հարցազրոյցում³¹ է. Ակնունին Տիգրան Զաւէնի հետ քննարկում էր Պատրիարքարանի՝ Բ. Դուռ ներկայացրած թագրիրում երեսփոխանական ընտրութիւնների վերաբերեալ արեւմտահայութեան պահանջները. «Մենք պահանջած էինք համեմատական ներկայացուցչութիւն եւ հայ երեսփոխաններու ընտրութիւնը հայ ժողովուրդին կողմէն: Կառավարական կուսակցութիւնը հայերու թիւին համաձայն երեսփոխաններ չկրնալով ապահովել, ատոր պատասխանատուութիւնը ձգած է իսլամ ընտրողներուն վրայ: Այս դէպքում ցնորք մը պիտի ըլլայ ընտրական իրաւունքը», - փաստում էր Ակնունին³²: Նա իրաւացիօրէն պնդում էր, որ Իթթիհատի կողմից նշանակուած հայ երեսփոխանները կը լինէին այդ կուսակցութեան եւ ոչ թէ հայ ժողովրդի ներկայացուցիչները Օսմանեան Թուրքիայի խորհրդարանում: Բնական էր, որ հայերը պահանջում էին իրենց ձայներով կատարել հայ պատգամաւորների ընտրութիւնը: Քանի որ Թուրքիայում 1913 թուականին մէկ երեսփոխանը 50.000 անձի ներկայացուցիչն էր, իսկ «Աշխատանքի» տուեալներով՝ այդ օրերին այդ երկրում 2.000.000 հայ էր ապրում, հայերը պահանջում էին քսան երեսփոխան օսմանեան խորհրդարանի համար³³:

Արեւմտահայութիւնն իր քաղաքական պայքարը կազմակերպել էր քաղաքակիրթ եղանակներով, այն է՝ խորհրդարանում հայ պատգամաւորներ ունենալու

նպատակով թուրքական կուսակցութիւնների հետ համագործակցելու եւ տարածաշրջանում հետաքրքրութիւններ ունեցող պետութիւնների հետ բանակցելու միջոցով: Անգամ պայքարի այս ճանապարհն արեւմտահայութեան դէմ աւելի էր զրգուել թուրքական իշխանութիւններին, որոնք 1913-1914 թուականներին արգէն բացայայտ կերպով սկսել էին սպառնալ հայերին, ընդ որում՝ ոչ միայն խօսքով, այլեւ կոնկրէտ ջարդերով: «Աշխատանքում» այդ կարգի սպառնալիքների բաղմամբ օրինակներ կային: Օրինակ՝ Թերթի Վանի թղթակից Ա. Հրահատը տեղեկացնում էր, որ Հայոց ձորի Անգղ գիւղի մօտակայքում երկու հայի եւ երկու քրդի միջեւ ծագած զինուած միջադէպից յետոյ թուրք ոստիկանները ազատ էին արձակել քրդերին եւ ձերբակալել էին ոչ միայն այդ երկու հային, այլեւ Անգղ գիւղի եւս տասնեօթ հայ բնակիչների: Երբ անգղյիները բողոքով դիմել էին Հայոց ձորի թուրք միւտիւրին, նա պատասխանել էր սպառնալիքով. «Հայեր, ձեր բոլոր ջանքն է, որ Ռուսիան միջամտէ, բայց զիտցէ՛ք, որ այդ պարագային ձեզմէ ոչ մէկը ողջ չպիտի թողուէք»³⁴:

Խուճապի մթնոլորտ էր տիրում Արեւմտեան Հայաստանում՝ 1913 թուականի վերջերից սկսած: Թերթը վկայում էր, թէ ինչպէս էին արեւմտահայերը «գլուխն աւաճ»՝ խուճապով խոյս տալիս հայրենի աշխարհից»³⁵: Հայրենիքը ճգնաժամի մէջ էր, իսկ նրանք հեռանում էին, լքում էին հայրենի աշխարհը, երբ անհրաժեշտ էր համախմբել ուժերը. այսպէս էր կարծում յօդուածի հեղինակ Տարաքիրը: Նա համոզուած էր, որ այս դէպքում հայրենիքն իրաւունք ունէր ասելու. «Փախէ՛ք դուք, բո-

30 Նոյն տեղում:

31 Այս յօդուածն «Աշխատանք» արտատպել էր Կ. Պոլսի՝ ֆրանսէրէնով հրատարակուող «Ստամբուլ» օրաթերթից (տե՛ս «Աշխատանք», Իզմիր, 1913, թիւ 46):

32 Նոյն տեղում:

33 Նոյն տեղում:

34 Նոյն տեղում, 1913, թիւ 15:

35 Նոյն տեղում, 1913, թիւ 20:

լոր անարիներդ, բոլոր վատերդ: Հայ աշխարհի փրկութեան մէջ դուք դեր չունիք: Փախէք, միայն զգոյշ, մի՛ անցէք այն նուիրական վայրերով, ուր հանգչում են Պետօներն ու Մարտիրոսները, Աւետիսեաներն ու Վաղգէնները, Սերոբ ու Գէւորգ Չաուշ, Արաբօ ու Տարօնի Առիւծ Սերոբ իր զոյգ կորիւններով ու բոլոր նրանք՝ անյայտ ու յայտնի, որոնք մի օր ընկան ձեզ համար, ձեր ճակատից ստրկութեան ամօթը, ձեր թիկունքից բռնութեան անարգ բռնը վերցնելու համար»³⁶: Հայրենիքը ծանր պահին լքողներին Տարագիրը դասալիք էր համարում: Միեւնոյն ժամանակ «Արտագաղթի առիթով» յօդուածում է. Ակունին դիմում էր տարագրուած հայերին. «Հայրենիքը ձեզ է սպասում, վերադարձէք: Դարձր կեանքն է Վաթանի, փախը՝ սկիզբը նրա մահուան»³⁷: Քաղաքական նման հայեացքներ ունեցող խմբագրակազմը, պարզ է, որ 1915 թուականին նոյնպէս պիտի շարունակէր պնդել, թէ հայրենիքը չպիտի լքել, եթէ այնտեղից թուրքական իշխանութիւնները քեզ բռնի չէին տեղահանել կամ կոտորել:

1915 թուականին «Աշխատանքը» կոչ էր անում Զմիւռնիայի գաւառի բնակիչներին օգնել Հայոց ցեղասպանութիւնից մազապուրծ եղած իրենց հայրենակիցներին ամէն տեսակէտով: Յօդուածներից մէկում նշւում էր, որ Իզմիրի «Աղքատխնամ» կազմակերպութիւնը չէր մտածում օգնութեան ձեռք մեկնել գաւառի հեռաւոր անկիւններում թաքնուող անտէր-անտիրական հայերին, որոնցից շատերը մի կերպ գոյատեւում էին սարերում ու ձորերում³⁸: «Զո՞ւմ մեղադրենք» հարցով էր «Աշխատանքը» դիմում ընթերցողներին՝ ներկայացնելով նրանց անտարբերութիւնը եւ խստասրտութիւնը, քանի որ մի կտոր հաց չէին տալիս սոված որբերին ու այրիներին³⁹:

«Աշխատանքը» մինչեւ 1915 թուականի՝ մեզ հասած վերջին համարները բարձրացրել էր ազգային դիմագիծը չկորցնելու եւ բռնազաւթուած հայրենիքում հայ մնալու խնդիրները:

Ամփոփելով՝ կարելի է փաստել հետեւեալը.

- Զմիւռնիայի «Աշխատանք» պարբերականն իր հրատարակութեան ողջ ընթացքում բարձրաձայնել էր ազգային միասնութեան անհրաժեշտութեան մասին՝ այն դիտարկելով իբրեւ օսմանեան տէրութեան մէջ հայկական դիմագծի ու հայապահպանութեան հիմնական եւ անհրաժեշտ միջոց,
- Թերթը ողջունել էր 1913 թուականին Զմիւռնիայում գործող Հայ աւանդական կուսակցութիւնների մասնաճիւղերի միասնական գործելու նախաձեռնութիւնը, թէեւ շուտով արձանագրել էր գործնականում դրա ձախողման փաստը, ինչը կործանարար էր համարել հայութեան համար ստեղծուած աշխարհաքաղաքական անբարենպաստ ու ցեղասպանութեան վտանգով լի պայմաններում,
- Պարբերականն առաւելապէս ազգային կրթութիւնն էր համարել հայեցի դիմագիծը չկորցնելու կռուան, ինչով էլ պայմանաւորուած էր եղել խմբագրակազմի առանձնակի մօտեցումը այդ թեմայի նկատմամբ,

«Աշխատանքի» վերլուծական յօդուածներում եւ խմբագրականներում երբեմն տրուել էին ծայրայեղ գնահատականներ՝ դրանցում բարձրացուող համահայկական եւ ներհամայնքային խնդիրների վերաբերեալ, թէեւ պէտք է փաստել, որ հիմնականում արդարացուած ու փաստարկուած էին առաւելապէս չէզոք դիրքորոշումներ որդեգրած այս պարբերականի

36 Նոյն տեղում:

37 Նոյն տեղում, 1913, թիւ 21:

38 Նոյն տեղում, 1915, թիւ 96:

39 Նոյն տեղում:

մտահոգութիւնները մասնաւորապէս ազգային դիմագծի պահպանման առումով:

Գրականութեան եւ մամուլի ցանկ

Ալբերտ Խառատեան, *Զմիռնիայի եւ Լճէյեանի առաջնեակի հայկական այլ գաղթօջախները (XVI-XIX դ. I կէս)*, Երեւան, 2022, ԳԱԱ «Գիտութիւն» հրատ. , 533 էջ:

Հայ պարբերական մամուլի պատմութիւն XVIII-XIX դարեր, Կահիրէ, 2006, 701 էջ:

Հայ պարբերական մամուլի պատմութիւն 1900-1922, հտ. 2, Երեւան, 2017, ԳԱԱ պատմութեան ինստիտուտի հրատ. , 786 էջ:

Վաւերագրեր հայ եկեղեցու պատմութեան, գիրք 8, Երեւան, 2001, «Հայաստան» հրատ. , 972 էջ:

«Աշխատանք», Իզմիր, 1910, թիւ 11, 1913, թիւ 2, 3, 5, 15, 17, 19, 20, 21, 23, 25, 26, 28, 29, 46, 1914, թիւ 52, 55, 1915, թիւ 96: